


平定三逆方略

三



總校官候補中書臣潘有為

校對官中書臣李斯咏

謄錄監生臣邵延曾

欽定四庫全書

平定三逆方畧卷十一

康熙十三年十一月壬辰調兵守興安

上諭
戶部興安要地應遣滿兵鎮守令於署副都統鄂
克爾哈等部內選騎騎二百人遣才能官員率赴興
安與奉天兵官光東等協力同守

奉化江寧將軍額楚泰改婺源縣

先是額楚泰婺源為賊所據如不取婺源即赴

饒州恐賊探知大兵已去又來犯徽請俟婺源復後休息士馬相機進取饒州

上諭額楚等若復婺源即進取饒州毋得因養馬遲緩令賊固守難於攻克致失事機至是額楚奏十一月十七日克復婺源於一二日間安撫殘黎即進取

饒州

上諭比聞婺源恢復良可嘉悅爾等兵單若進克饒州尤宜加意善後諸事相機以行

丙申

命大將軍貝勒洞鄂等速進四川

上諭兵部曰覽將軍赫業等奏保寧大兵糧餉阻絕困乏已極經畧莫洛已於十一月二十八日進兵貝勒洞鄂等至十二月初三日方始啟行莫洛所統之兵俱係綠旗巴蜀山路險惡滿洲大兵若不相繼進發恐賊輕視漢兵旁擊後遮均未可定今保寧大軍惟貝勒等是賴勅諭一到貝勒等即兼程而進會同經

畧莫洛速定昭化諸處接濟大兵勿得遲緩貽悞大計尋又

諭大兵糧餉關係甚重令陝西總督哈占巡撫杭愛多發官兵水陸防護令以次相繼勿悞兵食運至廣元將軍席卜臣副都統科爾崑四川總督周有德巡撫張德地等轉運軍前毋得稽遲致悞

臣謹按師行糧隨所係綦重况大兵深入險

阻已抵保寧轉運既艱侵遏可慮前者

上已命莫洛分兵據守朝天闢諸處護致糧餉川陝督撫悉心營辦無誤軍需既又命莫洛親率將士策應大兵至是又慮莫洛所領綠旗兵為賊所易道里險陘或有意外之虞命洞鄂以滿兵繼之俾首尾聯絡誠計出萬全使莫洛洞鄂等能恪遵

睿算連濟軍糈倍道前進則保寧士馬飽騰兵威殊壯
佇見收復全蜀長驅入滇矣夫何逗撓不前

餉道中梗以致王懷忠兵潰王輔臣叛變保寧之兵糧盡而還一切事機總不出

聖明預料之內也

丁酉

勅將軍尼雅翰等速滅安福賊

先是賊圍安福縣將軍尼雅翰等遣副都統幹都海前往援勦至是總督董衛國奏安福陷

上諭將軍尼雅翰總督董衛國公議速檄副都統幹都

海勒滅賊寇至遣發將軍等原令保固江西全省非
止鎮守所駐城池嗣後所轄地方告警即酌行調遣
應援

大將軍康親王傑書奏官兵敗賊於衡州

偽總兵桑明等領賊五萬餘犯衡州將軍賴塔
遣滿漢官兵於是月二十四日連擊敗之斬首
萬餘

庚子大將軍貝勒洞鄂奏王輔臣標兵叛於寧羌

洞鄂奏本月初五日據經畧屬下筆帖式戴祐等稱初四日提督王輔臣兵叛於寧羌劫經畧營經畧標下官兵或敗走或從逆經畧等莫知所在今臣等不能前進即於本日退保漢中

上諭大學士索額圖尚書明珠曰今報王輔臣兵叛恐人心震動醜類竊發前者各將軍大臣不遵指授互相觀望遷延不進以致逆賊得據大江之南賊渠未滅故又有此變朕欲親至荊州相機調遣速滅賊渠

吳三桂若三桂既滅則所在賊黨自當瓦解生民得
安爾等與議政內大臣密議以聞於是內大臣塔達
噶布刺頗爾益巴泰大學士索額圖尚書明珠
等奏

聖駕親征滅賊誠易但

皇上身關天下之重若

鑾輿前往恐奸宄妄布流言事生意外况京師根本所

係更要

皇上不宜輕出惟當居中運籌指授內外臣工相機調發

上曰卿等所言亦是朕且暫止親征至王輔臣兵叛不可不速發大兵前赴西安保固秦省前者署副都統鄂克濟哈等所率之兵分遣令往西安興安今興安姑且停徃若遣徃西安之兵尚未啟行即於全部兵內擇馬壯者每佐領二人鄂克濟哈星夜率赴西安餘每佐領兵一人令副都統色格率駐河南府鄂克

濟哈兵力尚單令將軍侍衛坤巴圖魯率所屬兵盡
赴西安與鄂克濟哈及副都統翁愛總督哈占保守
地方勦禦賊寇襄陽見有都統范達禮副都統李林
隆之兵其副都統德業立亦率每佐領驍騎一人星
赴西安與侍衛坤巴圖魯等合兵併移文順承郡王
度襄陽可虞即撥王所統兵每佐領一人遣往駐守
否則不必王與參贊各大臣公議酌行哈占翁愛等
於大兵未到之先并力固守地方仍偵探情形不時

馳報尋又

諭兵部據報王輔臣兵變其反與未反尚未得實即輔臣果反或出一時迫脅亦未可知其妻孥俱善存撫勿遽加害傳諭總督哈占知之

諭大將軍貝勒尚善等速取岳州

上諭尚善等曰王輔臣標兵反叛貝勒洞鄂等已退守漢中今當人心惶惑之時若克復岳州則人心自定稍有遲緩恐所在搖動倍多可虞貝勒等何日決戰

宜審機決策以期必得其速定議以聞

命調盛京官兵赴京師

上諭議政王等京師禁旅遣發頗多調盛京官兵一千
令副都統鄂泰率之至京烏喇兵七百令副都統安
珠瑚遣官領赴盛京其寧古塔兵令將軍巴海酌量
調發鎮守烏拉

辛丑遣理藩院員外郎拉萬祜等調蒙古兵赴陝

西

上諭議政王等奏省重要令理藩院員外郎拉篤祜圖爾哈圖鼐瑪岱往調鄂爾多斯兵三千五百歸化城土默特兵七百視西安路近即率赴西安若去省城紅遠即率赴蘭州其蒙古兵入何關口令總督哈占巡撫華善遣人接應芻糧如秦省可虞速催調兵前往若叛兵已散秦省無虞即移文停止其令鄂爾多斯貝勒索訥木歸化城土默特都統古嚕率兵前往

尋又

諭拉篤祜等曰爾等率領蒙古甲兵若已至邊內督撫檄令退還爾等毋得遽回仍星夜直抵西安若尚在邊外移文令退即當撤回若在邊內前塗遇有不虞即開路而進若報別路有警不必應援巡撫革善請兵爾等酌量分路率兵前往蒙古兵至西安聽將軍調遣將近邊界令將蒙古兵由各關口分道齊入廣為傳播以張聲勢後土默特兵奉調遄行先他部至上乃獎諭之曰土默特都統古嚕等為國効力率所部

官兵星馳赴調應期而至殊屬可嘉事平之日其有功人員該部議叙

命撥滿洲蒙古兵備調發

上諭兵部奏中告警應預派滿洲蒙古每佐領驍騎四人有事即行遣發其領兵官員爾部量選應用

壬寅

命將軍哈爾噶齊赴江寧

上諭兵部令大將軍安親王刻期抵江西將軍哈爾噶

齊調赴江寧參贊大將軍簡親王軍務鎮守江南

乙巳

命總督哈占宣諭倡亂官員兵丁

初聞王輔臣兵變

上即遣禮科給事中蘇拜費

勅偕輔臣子繼禎往撫隨又

諭哈占曰適據貝勒洞鄂等報經略莫洛提督王輔臣
標下官兵叛變隨遣科臣蘇拜持諭招撫爾即遵旨

通行曉諭負任其事加意安輯明告倡亂官兵爾等
皆因蜀道險遠糧餉不繼以致畏死情逼頓生變亂
誰肯甘心從逆自造釁殃其不得已之情朝廷具已
洞悉今特遣官前來安撫諭旨甚明有如皎日爾等
各有父母妻子恒產如能遵旨來歸官職如故士卒
願為兵者仍許入伍願歸農者令回原籍安插爾哈
占等皆朕倚信任用之臣務體朕至意速行撫諭早
定地方并傳

諭蘇拜曰爾偕哈占選擇能員不時賚勅招諭王輔臣
并安撫亂兵爾與哈占商酌如應親往即行親往若
有未可即遣能員前去務殫心籌畫以期必濟

丙午

敕大將軍順承郡王勒爾錦沿江預備戰艦嚴加守禦
平南王尚可喜奏逆賊於衡湘造船千餘欲分
發岳州荊州併進取江西將來春水泛漲沿江
一帶宜預為設備

上命大將軍順承郡王等量造戰艦於沿江要地嚴加
防守逆賊侵犯即行撲勦仍移知岳州大將軍貝勒
尚善等

命江寧將軍額楚駐師南昌

額楚奏部文令臣等俟安親王到江西即率所
部兵回江寧今安親王將到臣等酌量飼馬仍

回江寧

上諭大將軍簡親王及將軍華善帥兵駐守江南額楚

之兵既抵江西即於南昌駐牧不必仍回江寧俟安
親王前抵南昌額楚兵或赴撫州與將軍希爾根合
兵進取建昌廣信諸處或會同王師進剿或駐守南
昌聽大將軍王指授

命遣兵迎還廣元保寧大兵

上諭議政王等曰王輔臣標兵背叛廣元保寧大兵閹
侏甚重應遣兵接應若調將軍侍衛坤巴圖魯等兵
及西安兵發往恐王輔臣回據平涼西安守備單弱

應以京城所發兵每佐領三人速催啟行其羸瘠馬
匹留秣太原健壯者星夜選赴西安於諸軍內量撥
留西安駐守餘兵速遣赴大將軍貝勒軍前接應廣
元保寧大兵回至漢中

戊申

命將軍阿察達等帥師赴西安

先是

上諭議政王等奏省重要令將軍阿察達即率護軍四

十人自江寧速赴河南府併統副都統色格之兵暫駐鎮守俟每佐領四人兵到日即率赴西安至是

上又諭阿察達即率色格兵速赴西安京師所派每佐領兵四人以一人令夸蘭大等率赴河南府聽色格管轄其三人以達理善巴圖魯署副都統率之由山

西赴西安

江寧將軍額楚奏復饒州

賊衆三千餘於雲吉峰拒戰將軍額楚署副都

鄭三十七等率兵擊敗之進攻饒州賊棄城遁是月初三日遂復府城

庚戌大將軍康親王傑書奏官兵敗賊於金華

偽都督總兵徐尚朝等率馬步賊三萬土寇二

萬復犯金華是月初七日副都統瑪哈達都統

巴雅爾總兵官陳世凱等率兵於積道山連戰

敗之攻破木城殺賊二萬餘招撫偽官及兵七

百餘人

命總督鄂善等領兵赴興安

上諭議政王等曰陝西興安州西近漢中北接潼關東南直通鄖襄最為要地今秦中有警特遣大兵鎮守其副都統穆舒渾帶至襄陽之兵及蒙古甲兵增足一千令總督鄂善副都統希福率赴興安保固漢中諸處穆舒渾仍回荊州至於興安襄陽地屬接壤應令張犄角之勢有警即行互援都統范達禮副都統李林隆提督李胡拜等鎮守襄陽穀城如兵力單薄

大將軍順承郡王等酌量遣兵協守尋以鄂善希福到日方行遣發恐致遲緩即令穆舒渾於諭到之日率所部兵馳赴興安鄂善希福亦於諭到之日率蒙古兵赴興安與穆舒渾同守漢中諸處

命原任山東援勦提督周卜世為山西提督

上諭兵部秦省告警三晉接壤之地應設提督以資彈壓其以原任山東援勦提督周卜世為山西提督統

轄全省率標下官兵駐平陽府

命將軍尼雅翰帥師赴廣東

時平南王尚可喜以年老衰病亟請滿洲大兵
彈壓全粵

上命將軍尼雅翰率所部兵同副都統綽克托速赴平
南王軍前協守粵東

辛亥總督哈占奏王輔臣叛殺經略莫洛

哈占奏經畧莫洛標下中軍官吳石珊自棧道
逃回去經畧駐兵寧羌州南教場本月初四日

王輔臣標兵猝叛攻營經畧親隨滿兵併力射
却之既而輔臣挾衆來攻礮矢齊發經畧中礮
死章京筆帖式等或逃出或為賊所殺初七日
輔臣率叛兵至汚縣欲與貝勒戰值其標兵五
百及經畧標兵諸處運糧兵共二千餘一時星
散輔臣勢孤遂回略陽

壬子

敕大兵進福建應援海澄公黃芳度

芳度奏臣感念

國恩誓不與賊俱生練勁卒滿萬堅守漳城及龍漢五縣耿逆潛師援漳浦臣分兵邀擊賊衆大潰鄭逆復遣偽侍衛及叛鎮趙得勝來攻漳浦乞發大兵不拘何路進閩與臣併力掃除逆寇

上諭芳度堅守孤城練兵殺賊屢次間道陳奏忠貞可喜著於平閩之日併標下有功人員從優議叙平南王尚可喜俟克復潮州後即發兵應援芳度平定閩

省大將軍康親王傑書將軍希爾根等由浙江江西進勦福建大兵一到先移知芳度令速前迎來會

癸丑

命發帑金採辦陝西芻糗

總督哈占奏陝西百姓供應芻糧疲於奔命請令山西就近輸運

上諭山西運糧水路則有黃河汾渭之險陸路輸輓道遠勞費民不能堪令支戶部庫銀十五萬兩擇能員

解至西安採辦秦民正值困苦之際需用糧草若價
值稍增民爭什一之利自樂輸送庶不有悞軍需儻
有不肖官員苛派侵尅使民不得均沾實惠督撫指
名劾奏從重治罪

平定三逆方畧卷十一

欽定四庫全書

平定三逆方畧卷十二

康熙十四年正月辛酉

命大將軍安親王岳樂進取長沙

上諭兵部逆賊吳三桂據守岳澧諸處恃有長沙衡州之粟今安親王率師往江西可令一到南昌即簡江西軍中馬匹由袁州取長沙斷賊糧道夾攻岳州尋

又

諭今日事勢先滅吳逆為要安親王宜留兵守江西親
統大兵或由袁州或由安州乘便進剿湖廣攻取長
沙倘長沙未易下即令此兵擾賊耕種截其輓運取
資於適不但我兵無轉輸之勞而岳州糧盡賊可坐
困吳逆自不能久據常澧矣其移文安親王速行

臣謹按是時逆賊三桂得久據守岳澧間者

恃有長沙衡州之粟浮湘水達洞庭以資盜
糧也

皇上洞察賊情非斷其餽道難以猝滅乃命樂岳帥師
疾取長沙擾其耕種截其糧餉誠制勝之神

策使岳樂一聞

上命即尅期前進則長沙賊守未固何難即拔既拔長
沙則岳州糧盡賊可坐困而吳逆不能久據
常澧矣詎岳樂等逗遛不前屢奉

詔旨趣行始統兵進發迨攻下萍鄉賊已震怖復不能
乘勝長驅急攻長沙以致賊將馬寶悉衆來

援嬰城死守而湖南諸賊皆得苟延視息於此見

皇上沈謀英斷無不洞見幾先也

命叙浙江江西綠旗官兵

上諭兵部自逆賊吳三桂耿精忠背恩反叛浙江及江西袁州贛州等處綠旗官兵奮勇勦賊固守地方深為可嘉應即議叙以旌其勞爾部其速議之

壬戌

命大將軍貝勒洞鄂等簡兵躡王輔臣後

上諭議政王等曰王輔臣兵變雖下赦詔招撫猶恐未
即歸誠擾害百姓今將軍席卜臣等兵已抵漢中送
詣軍前馬匹留漢中者亦甚多貝勒洞鄂等其固守
要害簡諸軍中願自効者付賢能大臣躡王輔臣後
如輔臣歸順即令此兵仍回漢中倘或抗拒則相機

勦定

戊辰進封平南王尚可喜為平南親王

上諭吏禮兵三部平南王尚可喜航海歸誠勲猷茂著
太宗文皇帝嘉其勞績特賜王封及定鼎燕京復能殫竭
忠忱贊襄大業

世祖章皇帝知其夙篤忠貞畀以巖疆重任鎮守粵東海
氛寧靖百姓乂安近因吳三桂耿精忠等叛逆該藩
益勵忠純克抒偉畧悉心籌畫數建膚功朕甚嘉焉
事平優叙屢有俞旨前奏年老任重請以其子尚之
孝承襲王爵已允所請今思該藩累朝勲舊功著封

疆宜錫殊榮以酬茂績平南王尚可喜著進封為平
南親王即令其子尚之孝襲封尚可喜以親王品級
頂帶支俸示朕優眷之意廣東文武事務著尚可喜
照舊料理其親王之寶亦暫行掌管尚之孝統兵在
潮著給與大將軍印應行封典爾部即遵諭行

癸酉

勅諭王輔臣

當輔臣變叛

上既遣其子繼楨往宣諭尋又

頒專勅曉以大義發其悔悟之心於是輔臣留其子繼
楨遣原任郎中祝表正具疏自理委罪經畧莫

洛

上復命表正賚

勅往撫

勅曰前據陝西督撫奏稱入川兵丁忽爾生變念爾素
性忠直朕所深知國家待爾寵渥非常必無負恩悖

逆之事故特面諭爾子王繼楨前往宣布朕意恐爾
尚懷疑懼又降專勅於爾詳加開喻今覽爾奏變起
情形皆由莫洛控馭失宜軍心不服所致爾欽戢潰
軍具疏請罪爾之心跡無他朕已洞悉往事一槩不
究前諭甚明其爾所屬官兵俱行寬宥照舊歸伍効
用爾即率領官兵仍回平涼汎地照舊鎮守以固封
疆莫洛標下原帶官員已各免罪作何委用爾與總
督酌量題補其餘兵丁願歸農者令地方官加意安

挿願在爾標充伍者與總督商酌補入務令得所以副朕撫恤之意爾前功甚茂朕之待爾終始不渝其盡釋疑衷以圖後効果建殊勲竚膺懋賞

命撫莫洛標下潰散官兵

上諭總督哈占巡撫杭愛曰據爾等奏稱王輔臣兵變致經畧標下綠旗兵丁驚潰等語朕思秦省兵士舊在行伍者戍守著勞新行召募者驟經調遣今俱隨征遠出深軫朕懷事出意外必非無因念其變起倉

卒情非不得已未忍加罪爾等即宣諭朕意速行招撫
願歸營者隨便入伍願歸農者加意安插前罪一槩
不究其官兵人等父母妻子見在原籍者俱行宥釋
並不株連念伊等皆朕赤子特布寬典予以自新勿
得執迷不悟自貽伊戚爾等即廣行曉諭以副朕撫
綏招徠之意

諭大將軍貝勒尚善進兵機宜

上諭兵部先因王輔臣兵變令岳州官兵速進今輔臣

既具疏悔罪雖未即降而大兵雲集秦地已可無虞
宜行文貝勒尚善若岳州可取即速進兵如勢有未
便不宜輕動前已勅安親王由袁州取長沙度其將
到相機前進尋常善等奏臣等正治攻具取岳州賊
更浚濠三重其間復設陷坑木櫓竹簽周密環
布臣等欲移營前進又恐時當霪雨江水泛漲
營壘前後悉皆被水且我船與賊船甚近而荆
河口又居我後賊據上流殊為可虞誠如

聖諭不宜輕動臣當暫停進兵以俟機會

乙亥

命給保寧還師馬匹鎧仗

大將軍貝勒洞鄂奏將軍席卜臣都統赫業總督周有德等抵漢中臣等即酌留官兵守漢中而親統餘兵出棧道途經鳳縣留兵防守至鳳翔復酌留護軍驍騎付赫業駐鎮隨率餘兵至西安但席卜臣赫業等兵勞苦已極馬匹鎧仗

不能自辦請量行撥給

上諭馬匹鎧仗行軍要需今席卜臣等兵既極勞苦見駐西安諸將帥酌量給馬每人二三匹其鎧仗著正項錢糧修辦

命增漢中守兵

時前鋒統領穆占奏將軍席卜臣副都統科爾崑吳國禎馬一豹等領兵二千留守漢中

上諭漢中要地宜置重兵貝勒洞鄂等於西安兵內每

佐領撥士一人俾將軍侍衛坤巴圖魯副都統翁愛
德業立率赴漢中協力固守其糧餉令巡撫杭愛駐
漢中設法支給總督哈占陸續運送毋致缺乏
命大將軍貝勒洞鄂等備王輔臣

上諭貝勒洞鄂總督哈占曰王輔臣雖具疏悔罪正恐
借此以緩我師乘間為固守計若輔臣果聽命待罪
我兵但守疆界脫或揚言投誠而仍肆擾害勢將蔓
延爾等即相機勦禦

丁丑

命將軍阿察達帥師赴蘭州

上諭議政王等蘭州近邊要地應速遣兵駐守今保寧
大兵已回西安達理善巴圖魯兵亦將至西安其將
西安見在兵每佐領撥四五人以上令將軍阿察達
副都統鄂克濟哈考岱率赴蘭州勦禦逆賊併防階
州文縣諸處令鄂克濟哈考岱參贊阿察達軍務尋
大將軍貝勒洞鄂奏蘭州誠宜遣兵防守但保

寧還卒鎧甲馬匹未備達理善巴圖魯兵兼程
而來恐難驟遣西安所恃以禦賊者賴有調來
汝寧河南兵今將此兵發往倘王輔臣由陳倉
諸路斷我棧道自秦州平涼一時來逼深為可
虞

上復諭曰今據報逆賊已逼蘭州若不遣兵速援賊將
猖獗臨鞏被陷三邊一搖勢難猝定蘭州距秦州不
遠我兵若往蘭州則秦州便可襲取而平涼諸賊亦

可首尾夾攻阿密達等以文到之日即速赴蘭州保
固三邊倘逆賊中道阻截即攻取平涼或奪路前赴
蘭州其相機以行貝勒等速備馬匹器械給保寧回
兵其達理善巴圖魯之兵亦給與馬匹以備勦禦

臣謹按蘭州外控西陲內接臨葦為秦中要
區

皇上預料逆賊必來侵逼以蕩搖我邊境若非以大師
先據其地則臨葦不保而巖疆為之騷動矣

因命阿密達等統重兵赴守不獨保固三邊
兼可為襲取秦州夾攻平涼之計奈洞鄂不
能奉

命速遣赴機少緩蘭州果陷而臨鞏諸處胥為賊有幸
皇上亟命諸將帥分路進兵奮力齊攻而秦蘭臨鞏諸
州郡旋即收復逆賊勢孤力蹙坐困於平涼
良由調度迅速俾賊不暇自固故邊陲無警
而全陝亦遂晏然爾

庚辰

諭鄂爾多斯兵暫停進邊

先是王輔臣叛變遣理藩院員外郎拉篤祐等往
調蒙古兵歸化城土默特二部四子部茂明安部
烏拉特三部兵啟行前進鄂爾多斯兵亦嚴裝將
發至是理藩院侍郎博羅特奏天寒大雪鄂爾多
斯馬瘦不能前

上諭土默特等七旗甲兵赴調前來深為可嘉至鄂爾

多斯之兵與拉篤祐等馳驅往來天寒大雪士馬疲
困殊堪閑念著暫停進邊仍各整理器械以俟調遣
其七旗官兵令博羅特傳諭前進

癸未調兗州兵赴安慶

大將軍簡親王喇布奏江南財賦重地界接諸
省宜增守兵今副都統蘇朗帥蒙古兵一千守
池州署副都統額思赫率滿洲蒙古兵守蘇州
臣復以蒙古兵二百協守徽州將軍革善之兵

以五百赴浙江三百取饒州其見駐江寧者僅
蒙古兵四百臣所統者兵不滿千請令將軍額
楚等兵回駐江寧

上諭額楚既抵江西不必引還令駐防兗州署副都統
諾敏岳爾多率滿兵速赴安慶以備九江湖口窺伺
之賊江南有警即順流應援令簡親王統之京師滿
洲蒙古每佐領出驍騎一人領以署副都統伊巴克
圖馬爾齊哈漢軍每佐領出二人領以副都統郎化

麟俱赴兗州令將軍察哈泰統之署副都統等為參
贊兵到副都統孫承祖帥兗州所駐漢軍與諾敏等
會於安慶至盛京已調烏拉兵七百駐守其更調盛
京兵六百赴京師

乙酉撫諭興安叛兵

大將軍貝勒洞鄂等奏興安綠旗官兵以總兵
官王懷忠魁餉苛虐且聲言調兵坑殺衆遂作
亂共殺懷忠臣等出示安撫仍移會前徃興安

副都統穆舒渾兵中途暫止

上命頒發

勅諭付貝勒洞鄂總督哈占宣諭官兵尋隨征總兵官
党塞上京告變

上又諭之曰據党塞面奏王懷忠平日待下貪苛行事
乖戾衆心不服以致激變朕以爾等曾隨征四川勦
殺寇賊戮力勞苦今倉卒之變出於萬不得已非夙
圖倡亂者比是以未忍加罪特頒寬典嘉與維新已

經降勅大將軍貝勒總督宣諭今又令總兵官党塞
賈勅明布朕意將爾等從前罪愆槩行赦宥不究其
各歸營伍勦賊樹功以圖後効勿懷疑懼以負朕寬
宥恩撫至意倘仍觀望稽遲或聽奸宄煽誘之言妄
行作亂則國有明法勿遺噬臍之悔未幾哈占奏
勅諭抵興安文武各官集兵民宣讀莫不歡呼叩謝
皇恩感激思奮衆心遂定

丙戌

命大將軍貝勒洞鄂等固守棧道諸處

上諭洞鄂等陝西重道棧道關係尤急汚縣秦州乃通漢中要路前此川陝用兵頗失機宜今棧道若何據守汚縣秦州若何保固俾逆賊不得侵犯以保障全陝貝勒參贊大臣與總督會議務期萬全

戊子

諭大將軍安親王岳樂進兵機宜

先是岳樂奏兵部移文令臣速取長沙但今江

西所在賊擾人心未定臣若帥師前往則江西

兵單可慮况臣乘舟至南昌陸路道險雨阻戰

馬尚未全至今或宜進取長沙或先滅江西之

賊臣惟俟

勅旨遵行

上諭逆賊堅守岳州卒難攻取王所深知今若不速取
長沙恐賊復增守備克復尤難王云先定江西再取
長沙然彼時豈能必人心不搖豈能不留兵防守王

宜分兵留守要害速取長沙至是岳樂又奏江西形勢為廣東咽喉江南湖廣要衝見今三十餘城為賊盤踞且醴陵逆賊造設木城增偽總兵十餘人兵七萬裸裸三千堅守長沙萍鄉諸處臣若撤撫饒都昌防兵往長沙則諸處復為賊有不撤則兵勢單弱不能長驅且廣東諸路恐亦多阻臣欲先平江西賊寇無却顧之憂然後分防險要帥師前往

上復諭之曰逆賊吳三桂久據湖南奸宄乘勢竊發滇
黔川閩遂爾淪陷廣西陝西逆孽猖獗湖南一隅誠
賊根蒂四方羣寇所觀望必速滅三桂底定湖南則
各地小醜聞風自散今荊州兵未能渡江而岳州兵
又難驟進王抵江西宜由袁州直取長沙一以斷賊
餉道一以分賊兵勢一以扼廣西咽喉一以固江西
門戶烏合之衆自當瓦解荆岳大兵即可乘機直進
况寧羌告變川賊必通楊洪二賊窺我鄖襄擾我南

鄧侵我荊州後路揆其大勢進兵湖南斷不容緩且
南方卑濕延至夏月霪雨連綿大兵坐守日久不但
戰馬多斃糧餉亦恐不繼是取進湖南不再計決矣
王宜將江西要地速行整理稍有成緒即進取湖南
勿得坐視致悞機會

命總督蔡毓榮還荊州

上諭兵部前因大將軍貝勒尚善等欲攻岳州故令總
督蔡毓榮率標兵前往今貝勒等以逆賊固守岳州

暫停進取其令蔡毓榮以所部官兵仍回荊州

命分滿兵守荊河口

上諭議政王等今大兵全駐荊岳恐逆賊以荊河口空虛乘隙來犯其令順承郡王於荊河口對岸撥兵防守

平定三逆方畧卷十二

欽定四庫全書

平定三逆方畧卷十三

康熙十四年二月甲午恤保寧還師

上諭戶兵二部自保寧歸來軍士勞苦已極深為可憫
赫業瑚禮布瓦爾喀爾崑等所領兵著每人賞銀
十兩其前後所支錢糧俱免算除仍按月給餉

命大將軍貝勒洞鄂等帥師定秦州平涼諸處將軍侍
衛坤巴圖魯帥師開棧道前赴漢中

侍衛坤巴圖魯奏鳳縣賊毀偏橋設兵守險糧不得入守鳳縣李蘭大宗柱等以糧竭突圍出又同知張亢古來自秦州言王輔臣雖有降意其下阻之

皇上赦勅未示兵衆令輔臣部下王好文等率兵斷截

棧道

上諭貝勒洞鄂等至西安不即隨經畧取道秦州乃由棧道進托言馬瘠竟住漢中致寧羌告變王輔臣回

秦州時又不追蹕勦殺急回漢中及保寧兵旋僅留
將軍席卜臣等守漢中親統大兵輒回西安知棧道
險要不設重兵致狡寇阻截俾廣元朝天復為賊據
皆洞鄂等退縮之咎理應解職今專守西安但正值
臨敵姑令洞鄂總統兵馬定平涼秦州諸處勿仍前
逗留有悞軍機此行令貝子溫齊公綽克託將軍阿
密達前鋒統領穆占輔之如應分兵可給阿密達穆
占將軍印令為將軍侍衛坤巴圖魯可率兵開棧道

以進漢中鄂善哈占量留官兵守西安苟近地有警即行勦滅尋洞鄂奏將軍阿密達署副都統鄂克濟哈候補副都統覺羅奏岱於諸所調兵及京城西安兵共撥每佐領五人本月十四日率往平涼臣與固山貝子溫齊輔國公綽克託署前鋒統領穆占署副都統達理善巴圖魯副都統希福蒙古都統赫業護軍統領瑚禮布等於保寧還兵及達理善巴圖魯所領兵亦撥每佐領五

人本月十九日率往秦州又遣滿兵防守潼關
所餘之兵通計每佐領三人及鄂善所帶蒙古
兵四百餘人付哈占鄂善副都統穆舒渾等守
西安

丙申

命副都統鄂泰為建威將軍帥師駐太原

上諭兵部陝西沿邊有路通山西汾州恐逆賊乘隙來
犯其授副都統鄂泰為建威將軍統領所調盛京兵

一千人往駐太原防守汾州諸處以一等侍衛烏丹
為署副都統參贊軍事復調烏拉諸處兵一千人來
京

辛丑

詔總督哈占陳奏陝西情形

上諭兵部陝西情形邇來如何鎮守潼關滿兵係誰統
領兵數幾何保寧失散前鋒護軍曾否抵漢中爾部
速檄總督哈占一一具奏未幾哈占奏保寧失散前

鋒護軍絕無踪跡聞平涼賊衆四千餘能戰止
千人餘皆平民被脅為兵賊今將犯涇州又聞
吳三桂以銀二十萬付叛臣巴三綱散給王輔
臣及經畧標兵以相誘結今將軍阿察達於本
月十四日進兵平涼貝勒洞鄂於十九日進兵
秦州夸蘭大拜音察莽奕圖以兵五百守潼關
署副都統阿爾祜以兵五百守寶雞副都統延
布率兵五百前往鳳縣而棧道已為賊據今與

將軍侍衛坤巴圖魯暫駐寶雞至若三水淳化
白水蒲城韓城諸縣土寇蜂起劫掠村聚分我
兵勢臣揆度情形剿撫並施大約渠魁既殄小
醜自當瓦解無足慮者至臣所請令蒙古由寧
夏進駐固原雖曰為平涼蘭州實疑寧夏延綏
官兵也今下馬闖靖遠營官兵心懷叵測俟偵
探得實再疏以聞

壬寅

詔赦陝西從賊官吏兵民

上諭兵部秦中兵民皆朕赤子年來保固地方轉輸糧餉急公好義勞苦倍常朕心每切軫念近因入川兵變人情惶擾一時無知割辮去纓以圖幸免事起倉卒情可矜原今特布寬典予以自新其臨鞏平慶等處文武官員軍民人等凡有割辮去纓者一概赦免不究官俱照舊供戰兵丁各歸原伍百姓各安生理乙巳大將軍康親王傑書奏官兵復處州

副都統瑪哈達總兵官李勞等正月初八日復
永康十五日復縉雲乘勝進取處州賊將王宗
保以兵遏桃花嶺官兵擊敗之賊棄城遁處州
遂復

庚戌

命副都統佛尼勒為西安將軍

時西安將軍瓦爾喀卒於軍故以佛尼勒代之

壬子

勅陝西諸將速進兵勦賊

總督哈占奏本月初五日賊犯蘭州撫標官兵
倡亂應賊城陷巡撫革善按察使伊圖奔涼州
布政使成格未出

上諭大將軍貝勒洞鄂將軍阿密達等統領大兵分路
速進恢復秦州平涼掃除逆賊以定三邊總督哈占
周有德鄂善巡撫杭愛張德地等堅守漢中相機進
剿併察檄提督張勇總兵官孫思克陳福王進寶等

整兵固守汎地前來夾攻

丙辰

命岳州荊州設水師營

總督蔡毓榮奏賊船往來長江狡謀叵測

上命候補副將花善為岳州水師副將設兵一千五百

人尚之禮為荊州水師副將設兵一千人各為左右

二營以資防禦

三月庚申

勅大將軍貝勒尚善等防護戰船

先是自岳州發往荊州戰船遇風漂散有數船
為賊所得坐塘筆帖式以聞

上諭兵部戰船經由長江大將軍等應嚴飭所司加意
防護乃急忽漂失反為賊資嗣今凡船往返宜以纜
索牽引遇風則泊倍加慎謹爾部其速行檄諭至是
尚善等奏風壞沙唬船五十餘隻沈沒戰船四
隻請敕撫臣速發修船物料

上復諭沙曉戰船行兵急需闢係重大侍郎勒布巡撫
張朝珍等速將修船物料委賢能官員送至岳州並
行修理岳州船兩次被風如果停泊得所風豈能壞
其嚴飭大將軍貝勒等務擇地停泊善為防護

諭大將軍順承郡王勒爾錦等進兵機宜

先是將軍貝勒察尼請分岳州每佐領兵二人
發安親王軍前協定江西規取長沙湘潭約荆
州岳州將軍三路並進

上諭勒爾錦等公同速議并令安親王岳樂參酌奏聞
至是岳樂等奏若岳州兵來足資臣進勦兵力
即守江西亦有裨益

上諭自岳州發兵至江西正值溽暑霪雨於王進勦之
期又恐無及其罷勿遣發勒爾錦等奏臣商之貝勒
尚善據云遣發江西之兵已經停罷欲撥岳州
兵每佐領三人令貝勒察尼都統巴爾布率赴
荊州臣俟此兵到日即從翼陵以下石首以上

相機渡江

上諭王及參贊大臣等身在地方具陳機宜固當如議
但入川大兵見以糧餉不繼退駐西安今我兵渡江
之後萬一川賊乘桴東下侵犯荊州彝陵茅廬山賊
又出襄陽諸處則我軍必至却顧難以長驅王貝勒
等皆朕懿戚參贊大臣皆朕股肱今與賊相持視可
行則如所請行之儻有可虞寧俟秋冬相機進取

甲子

命大將軍康親王傑書詳奏軍中情形

上諭傑書曰王前奏克取處州之後酌量前進又稱貝
子治浮橋戰船將告竣旦晚由各路征勦逆賊而分
兵取黃巖今台州浮橋成否已渡江否及王進兵之
事與軍中情形若何浙江事勢若何王其一一奏聞
尋傑書奏臣恢復處州即圖前進因兵少不能
深入且仙居與縉雲桃花嶺通今復為賊據恐
乘間突出以斷我後則我兵甚危處州經賊蹂

躉兵無積粟轉運維艱綠旂兵旂兵守處州滿洲兵守縉雲分調台州兵速取仙居以會副都統瑪哈達之兵俟其兵到相機而行此臣二月中所奏報也後因偵探溫州情形調兵仙居文移往來日久賊衆已據溫州青田陸路則險要俱阻水路則舟楫不備貝子又言俟定海舟師到始可水陸三路進兵以故調兵仙居之說中止此臣三月中所奏報也台州浮橋已成提督

常進功素諳水戰因遣赴貝子軍前率舟師征
勦今貝子言常進功以風信未順二月十九日
始出定閩二十三日遇賊敗之再山賊多伏兵
海島必俟餘逆盡殄始赴台州今賊將連登雲
由松溪龍泉徐尚朝由溫州合力逼處州臣已
遣副都統瑪哈達總兵官李榮等擊却之繆村
為衢州咽喉賊乘夜渡河掩襲副都統拉哈總
兵官王庭梅擊敗之總之浙江大勢必俟舟師

既至台寇已平再酌機宜共圖進取

命西安將軍佛尼勒為振武將軍援漢中

先是大將軍貝勒洞鄂奏今將軍侍衛坤巴圖魯留副都統阿爾祜延布兵一千守寶鷄自帥每佐領兵一人協臣等攻秦州臣思川賊近在

沔縣不取棧道不特漢中可危而大兵糧糗亦恐有阻

上命將軍侍衛坤巴圖魯等以文到日即率師開棧道

進漢中至是總督哈占等奏漢中地方甚要今
既授副都統佛尼勒為西安將軍宜令統一軍
前進

上諭侍衛坤巴圖魯等兵進漢中則已若未行即以兵
付佛尼勒用振武將軍印由棧道進漢中副都統延
布參贊軍務侍衛坤巴圖魯副都統翁受俱赴大將
軍貝勒軍前不得與謀議令副都統德業立阿爾祜
守寶雞鳳縣以疏餉道

丁卯

命都統拉哈達參贊大將軍康親王傑書軍務

傑書以參贊諸臣俱分遣禦賊請令鎮守杭州
都統拉哈達赴軍前參贊軍務

上從之令副都統雅塔理署杭州將軍印并令寧海將

軍貝子以下及各將軍兵聽康親王便宜調遣

庚午大將軍貝勒洞鄂奏復闕山闕

二月二十八日洞鄂等至隴州之仙逸闕偽總

兵高鴻蔡元率馬步兵四千立二營於闕山河
岸前鋒統領穆占將軍佛尼勒副都統達理善
巴圖魯等率兵進擊都統赫業復以兵繼之賊
潰走追擊五十餘里乘勝遂復闕山闕

辛未調太原兵援陝西涇州

總督哈占奏將軍阿察達等於本月初四日戰
於平涼不利退駐涇州請調太原兵五百人赴

涇

上命調將軍鄂泰副都統烏丹兵五百人令賢能官員率往西安聽總督哈占等酌遣阿察達軍前鄂泰等仍統餘兵及太原保定兵防守山西更令順承郡王調岳州兵每佐領二人以副都統一人率其半往襄陽防守以賢能參領率其半往西安已而大將軍順承郡王勒爾錦奏俟岳州發兵必至遲久因於見在荊州驍騎營每佐領二人以夸蘭大達爾泰率其半於本月二十日

赴西安副都統巴喀率其半於二十一日往鎮

襄陽

命致巨礮於西安

上諭議政王等大兵進取秦州平涼攻城破敵不可無
礮其發紅衣礮四十漢軍內每佐領選諳練甲士三
人令漢軍都統海爾圖左翼副都統佟世德右翼副
都統張所養率之送致西安復撥每旗滿洲賢能官

一員甲士十人同往

命都統畢力克圖為平逆將軍帥師赴大同

上諭議政王等宣府大同俱係要地應設兵防守今調
邊外察哈爾前鋒護軍驍騎令左翼由張家口入駐

宣府右翼由殺虎口入駐大同授都統畢力克圖為
平逆將軍率盛京兵六百赴大同總統兩翼軍每翼
不拘滿洲蒙古各選賢能參領以行

乙亥

命大將軍安親王岳樂速定進兵機宜

上諭岳樂曰王輔臣作亂陝西振動逆賊耿精忠出仙
霞嶺將逼衢州王抵江西日久應速滅江西賊進取
長沙今或俟平定建昌廣信後進兵或固守諸汎地
即行前進其速議密奏尋岳樂奏閩賊盤踞建昌叛
兇以廣信為巢穴江西各處騷動皆由兩地賊
亂之故今若不滅此賊即進長沙恐他處復有
竊發則江西可危臣擬於本月二十六日往剿
建昌廣信稍有成績即進取長沙湘潭諸處

丁丑

命提督張勇等進取蘭州

勇奏自寧羌告變秦州諸處繼失臣與甘肅鎮

臣孫思克西寧鎮臣王進寶率官兵兼程應援

甫至中逕蘭州陷賊欲進兵恢復其如河水已

開邊報又至是以撫臣親至永昌與臣面議駐

兵莊浪兩相應援當此在在多事之際河西三

鎮兵已應經畧總督調遣宜召募補伍臣標及

三鎮屬員被調員缺并授誠及年老宜更置者
欲與督臣會題候部推補恐道阻不能卒至請
聽撫臣就近選委河西官兵入春缺餉乞

勅戶部撥山西餉銀從榆林寧夏接濟又道路梗塞臣

欲從邊外奏請機宜乞

勅蒙古貝勒遇臣差官毋得隔阻且為引導

上諭三邊經調缺額官兵及標員宜更署者並聽提督
張勇募補委換河西兵餉著總督哈占巡撫杭愛俟

道路少通速行撥解至欽邊外齋奏甚當可遣理藩院賢能官於鄂爾多斯地方沿途設站遇齋奏人員給驛馬導之使來今大將軍貝勒洞鄂等已圍秦州將軍阿察達已進取平涼提督張勇巡撫華善總兵官王進寶等其速進取蘭州會貝勒等協力夾勦以定臨鞏

命總兵官陳福為陝西提督

先是逆賊王屏藩厚撫陳福妻予以誘福福執

志不變

上特授三等阿達哈哈番至是復

諭兵部寧夏總兵陳福効力嚴疆勞績素著屢首逆劄
克篤忠貞且其妻子家屬見在川中逆賊挾誘全無
顧戀矢志不移深為可嘉著以見兼賊銜陞補陝西
提督給與勅印仍駐寧夏管總兵官事務俟逆賊底
定後即赴平涼料理提督事務福弟守備奇家口并
陷賊中亦可憫念著從優以參將擢用

命提督張勇為靖逆將軍

勅諭張勇曰爾以重臣宿將偉畧弘猷久鎮巖疆勞績
茂著自逆賊煽亂以來保障西陲輯寧中外近復協
同撫鎮率領將士矢志戡亂恢復城池克篤忠貞殫
心籌畫朕甚嘉焉茲特命爾為靖逆將軍仍兼管甘
肅提督事務總督不得節制一切征勦機宜聽爾便
宜以行鎮將各官悉聽統轄調遣所屬武職有應調
補者即行補授具題爾即整頓兵馬會同撫鎮等進

勦逆寇平定地方早奏膚功以副朕委任之意

加總兵官孫思克王進寶職銜

上諭兵部甘肅總兵官孫思克西寧總兵官王進寶見
在領兵征剿宜加職銜以便統轄其加孫思克左都
督王進寶都督同知事平之日俱以提督先用
命總督哈占等遣兵援寧夏

提督陳福奏王輔臣盤踞秦州使叛將朱龍之
子引賊犯定邊賊家奴自內應城遂陷

上諭定邊係三邊咽喉要地其令總督哈占總兵官許
占魁速發官兵前赴寧夏會同提督陳福并力進取
已卯加都督許貞太子少保

上諭兵部江西屯墾都督許貞屢勦逆賊著有勤勞深
為可嘉其加太子少保

癸未調總督鄂善等領兵赴榆林

先是提督陳福奏花馬池副將齊圖於本月初
八日叛從朱龍至是總督哈占又奏靖邊兵民

自內應賊以致城陷

上諭總督鄂善周有德巡撫張德地各率所部兵速赴
榆林會同總兵官許占魁協守地方勦禦叛寇又蒙
古馬雖疲瘦不久草青宜酌調四子等部落兵由寧
夏榆林兩路前進速定地方

丙戌將軍張勇奏官兵敗賊於新城

時逆賊沿河盤踞勢甚猖獗二月二十三日總
兵官王進寶以草囊結筏潛行渡河敗賊於河

口復設伏大敗之於新城

平定三逆方畧卷十三

欽定四庫全書

平定三逆方畧卷十四

康熙十四年四月己丑朔

命總兵官張和善率所部兵還真定

上諭兵部曰曩者一有賊警即遣真定官兵赴楚防守
已閱年餘備極勞苦今武昌見有滿洲蒙古及撫標
城守水師兵可令真定總兵官張和善率所部仍回

原汎

乙未封將軍張勇為靖逆侯授西寧總兵官王進
寶世職

時王輔臣遣人持吳三桂偽諭劄印授勇勇斬
其使以

聞進寶擒獲間諜舉首輔臣遂書

上嘉之封勇靖逆侯授進寶阿思哈尼哈番

丙申

命將軍佛尼勒等勦仙逸闕諸賊

先是

命佛尼勒率兵開棧道進漢中至是總督哈占奏報仙
逸關有賊三千餘奪蘭大宗柱等兵不滿四百
難以防禦又平隴之間亦有賊三千餘竊踞華

亭

上諭仙逸關係通大兵要路將軍佛尼勒親統官兵勦
滅諸賊或令副都統德業立延布領兵赴勦其酌量

速行

丁未

命鄂爾多斯兵進邊會勦

上諭兵部曰理藩院郎中喀喇費來報文鄂爾多斯部落多羅郡王固噶多羅貝勒索諾木固山貝子達爾扎鎮國公都棱以提督陳福等移會徵兵俱量行遣發駐邊外俟調又達爾扎親統所部即欲進邊前者本以隆冬雪盛暫止其進兵今彼既調兵而來可即令入邊會同提督總兵等兩路進勦郎中顧業圖員

外郎拉篤祜即參贊軍務至鄂爾多斯兵進邊之後
糧餉每得缺乏額業圖等如戶部所定餉額從所屬
有司支取散給

癸丑將軍侯張勇等奏官兵復臨洮

時偽總兵陳可等據臨洮總兵官王進寶率綠
旗官軍及土兵由金縣提標兵由沙沉站兩路
進攻三月二十三日真抵臨洮拔其城

甲寅

詔撫左翼察哈爾

時調宣府左翼四旗察哈爾鎮大同衆譟毀邊
牆私遁參領舒什蘭以

聞

上命察哈爾散秩大臣綽爾濟都爾瑪等副以八旗官
員及侍衛貴

勅撫之曰昔察哈爾潰散時爾等祖父來歸

太宗文皇帝以次賜與世職分隸八旗眷顧撫養以迄於

茲吳三桂造亂調爾駐守地方今叅領舒什蘭奏爾等不請於主者遽爾遁歸理應治罪但先既調爾八旗察哈爾同官兵進剿今又盡徵餘兵爾等或慮妻子牲畜無人養育馬又羸瘦難以從征以此亡歸其情可恕今特行寬宥其各返故伍如常母生疑畏昔額哲阿布柰被俘不沒入旗下為奴尚額哲以公主封為親王所部人員亦加撫養亡國苗裔無功而施大恩若此古所希有阿布柰曾有大罪又全其命以

其子布爾尼襲封親王布爾尼不思報効背恩叛逆
故命大將軍信郡王率兵進討於是月二十二日大
破之答慮盡殲其衆科爾沁等諸部王貝勒貝子公
台吉等俱以布爾尼罪大惡極發兵會剿恐爾等不
知此等情事妄惑流言陷於罪罟故特賜曉諭

調兵援秦州漢中

大將軍貝勒洞鄂等奏逆賊萬餘自四川來援
秦州屯於南山臣等勦禦內外賊寇兵力單薄

已令副都統延布率兵六百守隴州副都統德業立率兵六百守仙逸關將軍佛尼勒率每佐領兵一人速來軍前請再將西安官兵酌量調發

上諭貝勒洞鄂等圍困秦州所關最重倘秦州之軍可慮西安亦且難保今佛尼勒雖已調至而兵力尚單除荊州調往每佐領兵一人外或西安兵或附近汎兵令總督哈占鄂善等速撥五百人赴秦州并令總

督周有德亦率所部兵星馳前往同貝勒等會剿賊
寇俟擊敗川賊後貝勒等即酌分官兵赴援漢中尋
又

諭漢中地屬緊要不必俟下秦州即宜發兵赴援可令
將軍鄂泰率駐防太原盛京兵前往西安至日總督
哈占等擇西安兵內馬肥者并酌分隴州寶雞兵俱
付副都統德業立率往漢中其鄂泰建威將軍印留
興署副都統烏丹代署如烏丹興平逆將軍畢力克

圖軍合則用畢力克圖印烏丹為叅贊更自京師發
每佐領驍騎一人令署副都統一人率赴太原

乙卯

諭總兵官孫思克防邊

巡撫華善等奏邊外蒙古前犯洪崖堡今又乘
我兵進剿河東乃折毀關隘襲執官吏與官兵
會戰永固城副將陳達戰歿

上命孫思克嚴飭將弁加意防備邊疆如蒙古仍行肆

害即率兵勦禦陳達如例恩卹復遣使往

諭達賴台吉約束部落毋為邊患會達賴喇嘛使來并
予勅使轉諭達賴台吉

勅曰

皇帝勅諭達賴喇嘛吳三桂初叛朕諭喇嘛大兵分路
進討若三桂勢蹙投降喇嘛其即執送續覽喇嘛奏
云吳三桂背主負國人皆惡之不來則已來即縛之
以獻三桂曾取界得母揚大母二城今已發兵攻取

防守沿邊若欲徵兵深入惟候詔旨又言達賴台吉
故居土默特今遣居胡虎諾兒令其有事則相援無
事則鈐轄其部屬朕恩自

聖祖太宗皇帝

聖父世祖皇帝至今遣使往來恩禮無間喇嘛崇尚信義
必如所奏而行故遂以達賴台吉等進兵滇蜀之故
曉諭兩省及達賴台吉尋辭以松潘路險未進四川
喇嘛又奏言蒙古兵力雖強難以進邊縱得城池恐

其貪據且西南地熱風土不宜若三桂力窮乞免其死罪萬一鴟張莫若裂土罷兵三桂乃明時微弁父死流賊搖尾乞降

世祖皇帝優擢封王尚其子以公主朕又寵加親王所受恩典不但越絕朝臣蓋自古所罕有三桂負此殊恩構釁殘民天人共憤朕乃天下臣民之主豈容裂土罷兵但果悔罪來歸亦當待以不死今將軍張勇等奏達賴台吉諸部落入邊侵掠彼以王輔臣倡亂內

地亦皆騷動故也今西陲晏然內地無事已下勅禁
諭達賴喇嘛宜確守前言令其統轄部屬毋得生事

擾民

戊午

命內大臣國舅佟國綱為安北將軍帥師鎮宣府

散秩大臣綽爾濟等奏臣等至張家口詢關吏

據云本月二十七日察哈爾兵至鄂西奚地方

將

御馬廄并諸大臣牧馬人役附近旗下蒙古婦女牲畜
盡行掠去及臣等至齊勞地方遣一等侍衛阿
納等前進遇察哈爾被脅四人遂擒以歸其言
亦如之臣等欲竟將

勅諭送往恐此輩無知不體

聖意故將

詔旨大略抄寫即令擒來二人責送精奇尼哈番阿遇
席等復遣二人傳諭被掠人衆

上諭察哈爾兵狂悖如此應發兵防禦其授內大臣國
舅佟國綱為安北將軍率每佐領護軍一人驍騎二
人往鎮宣府令護軍統領傑殷副都統恰塔偕往以
散秩大臣綽爾濟都爾瑪為署都統并預參贊

平定三逆方略卷十四

欽定四庫全書

平定三逆方畧卷十五

康熙十四年五月壬戌大將軍安親王岳樂奏復

建昌

岳樂等進取建昌於四月二十五日抵長興賊
將邵連登等率賊八萬餘水陸迎敵岳樂與將
軍希爾根等分布官兵擊敗之斬獲甚衆遂復
其城

庚午侍衛奇塔特等奏左翼察哈爾輸誠

先是一等侍衛奇塔特博羅特等齋

勅招撫左翼察哈爾至是奏臣等於本月初七日抵察

哈爾營問以叛故據云右翼四旗被戮將馬分

給綠旗今又欲調左翼四旗至大同誅之又聞

四十九旗部落俱叛我等妻孥為所俘掠故衆

心驚惶毀牆私遁以致擅奪牲畜遣人交通布

爾凡此皆我等死罪豈望生全臣等因領

赦詔察哈爾欣感遂復歸順

臣謹按先因陝西有警調左翼四旗察哈爾駐鎮宣府嗣布爾尼叛構造流言轉相煽動若輩怵於其說遂毀邊牆私遁意欲仍歸故地依附黨類

皇上諒其頑冥無知特因一時疑惑疑懼逃歸不忍遽加誅戮乃遣奇塔特等前往招撫諭以

國家優遇察哈爾之恩併疏布爾尼倍逆罪狀大兵勦

滅情形委曲開示曠若發蒙所以羣心聳悟
銜

恩悔罪蹕躍歸誠仰見

皇上大德好生真上侔乎天地也

甲戌

命都統海爾圖總督周有德等平仙逆闖賊運紅衣礮

至秦州

送礮都統海爾圖等奏臣等於本月初八日抵

西安聞自荊州來之兵及貝勒催買弓矢護衛俱為賊阻暫駐隴州仙逸關諸處若不滅此賊恐紅衣礮不能前進乞添發滿兵二千勦滅關賊疏通道路

上諭秦州需礮甚急若俟發禁兵恐稽時日今都統海爾圖總督周有德叅領達爾泰等兵合計已足二千其即合兵以平關賊速運紅衣礮前往秦州嗣海爾圖等至仙逸關與賊相持

上復諭兵部欲平陝西諸寇必先取秦州欲取秦州必
須大礮今海爾圖等率兵護送紅衣礮與賊相持於
仙逸關但在彼諸臣各自將兵恐互相推諉致誤軍
機其令周有德海爾圖為兵主滿洲漢軍副都統等
俱為參贊衆軍合而為一復立隊伍設官統制若至
貝勒軍前周有德海爾圖仍為參贊

諭大將軍康親王傑書安親王岳樂進兵機宜

先是議政王等奏據貝子傅喇塔報稱俟提督

常進功舟師自寧波到日令其護守浮橋即自率兵渡江取黃巖但時方風信未順水師不能遽至恐需時日以致師老且大兵俱集貝子所故康親王兵單未得進閩今安親王恢復建昌廣信諸郡若乘機進取建寧則仙霞賊勢必分貝子應量留兵駐守餘兵悉令康親王統轄規取仙霞若賊并力拒守則安親王乘虛而入建寧必破如此兩路夾攻得一路克捷便可翦滅

閩賊

上命康親王安親王詳議以聞至是康親王傑書疏言
寧波舟師不能至台州已回定關近攻小梁山
又不能克台州兵止三千餘不宜輕調處州見
有賊警金華兵力單弱似難驟進閩疆若安親
王果進取建寧以分仙霞賊勢臣豈敢坐失機
會按兵不前安親王岳樂又疏言常興賊已勦
滅建昌賊亦解散見調將軍額楚副都統席布

兵撲剿廣信之賊如令臣下廣信由分水關取建寧則當分兵留守建昌親統官兵前進如令臣由杉關取福建即當分兵留守廣信由杉關前進

上乃諭曰近報寧州陷賊且時方炎暑安親王酌留官兵固守建昌諸處率大軍暫回南昌息馬俟秋涼或取湖南或攻福建俟旨以行額楚席布等應速廣信信賊臨分水關陽為前進斷仙霞後路康親王即令

將軍賴塔等兵乘機攻取仙霞或康親王兵與額楚
等兵兩路並進夾攻江山賊寇二王亦宜遙通聲勢
以赴機會

戊寅

命貝勒察尼勦南漳諸處賊

大將軍順承郡王勒爾錦奏據都統范達禮報
逆賊五六十絡繹來犯南漳楊洪二逆兩路齊

出臣隨卑都統伊里布討逆將軍印昇遣副都

統根特統兵於本月初三諸日前往旋報穀城失守又畀貝勒察尼為將軍率兵赴援

上諭既以貝勒察尼為將軍率兵赴援即令統轄襄陽諸處官兵速滅南漳穀城賊寇平定地方又襄陽要地宜設重兵其令汝州副都統色格率所部兵星赴襄陽安慶署副都統諾敏副都統孫承祖各率所部兵赴汝州駐守未幾察尼等議遣伊里布范達禮率

兵收復穀城

庚辰調將軍畢力克圖等帥師援榆林

上諭議政王等今左翼四旗察哈爾既已歸順應調山西兵援陝西以將軍國舅佟國綱所領前鋒兵及每佐領護軍一人駐大同盛京全軍綠旗馬兵三百人右翼察哈爾兵三百人付將軍畢力克圖率赴榆林同總兵官許占魁協力平定延安諸處令護軍統領傑殷協領覺和托參贊軍務覺和托仍署副都統又令副都統恰塔率每佐領兵一人赴大同兼統見駐

大同兵鎮守其餘每佐領兵一人調赴太原併太原
汎守及保定調往兵令署副都統烏丹總統用建威
將軍印鎮守國舅佟國綱散秩大臣綽爾濟都爾瑪
等俱著回京既延安綏德諸處陷賊榆林危急許占
魁請援又遣其子登隆至京師言狀

上復命畢力克圖速分兵付覺和托先赴榆林畢力克
圖速率兵繼進

癸未

命副都統德業立率兵勦關山賊

總督周有德奏參領達爾泰兵見阻關山請調滿

漢官兵赴棧道者來共滅賊以便運礮至秦州

貝勒等大兵在秦州路梗不通為日已久
山賊以開道路其令赴棧道副都統德業
立率所部兵速往關山會同延布達爾泰海爾圖兵
并力破賊開道運礮軍前

平定三逆方畧卷十五